

船山遺書

冊
一

周易內傳卷二

衡陽王夫之譔

三三同人

離下
乾上

同人于野亨利涉大川利君子貞

同人者同於人而人樂與之同也剛者柔之所依一陰固願同於衆陽柔者剛之所安衆陽亦欲同於一陰凡卦之體以少者爲主二者同人之主也柔而得意無離羣孤立之心而少者物之所貴而求者也則五陽爭欲同之矣于野者訖乎疏遠迨乎邱民皆欲同之之謂爲衆所欲同其行必亨柔非濟險之道而得剛健者樂與同心則二之柔旣足以明照安危之數而陽剛贊之以涉大川必利矣利君子貞者柔居中而得位故與物同而無容悅詭隨之失凡應事接物者不正而利其邪彌甚故易無有言利不貞者君子之貞無所不利而此獨言利君子貞者以同非君子之道則其利似非君子之貞然吾非斯人之徒與而誰與義不可得而異惟大同斯利矣君子之利合義而利物也非苟悅物情

而所欲必得之謂也

彖曰同人柔得位得中而應乎乾曰同人

具此三德故人樂得而同之二正應在五不言應剛而言乾者人之志欲不齊而皆欲同之則爲衆皆悅之鄉原矣惟不同乎其情之所應而同乎純剛無私之龍德以理與物相順得人心之同然而合乎天理斯爲大同之德而非苟同也

同人曰同人于野亨

本義曰同人曰三字衍文按于野之義未釋蓋有脫誤

利涉大川乾行也

應乎乾而乾同之剛健以濟柔故無險不可涉

文明以健中正而應君子正也惟君子爲能通天下之志

文明非暗私之好剛健非柔佞之交君子之同同於道也同於道則能通天下之志而天下同之小人之所以同天下者苟以從人之欲而利於此者傷於彼

合於前者離於後自以爲利而非利也

象曰天與火同人君子以類族辨物

火在天中以至虛含大明明不外發而昭徹於中人之貴賤親疏賢愚物之美惡順逆取舍無不分別以其類而辨其情理則於天下無不可受而無容異矣大明函於內而兼容竝包以使各得明發於外憲天敷治而賞善懲惡以統羣有存發之道異上下之用殊同人大有君子竝行而不悖也

初九同人于門无咎

初居退藏之地而以剛處之動而不括以上承六二故一出門而卽得其友不自安於卑陋以求合於賢而相麗爲明雖交未及遠亦无咎也

象曰出門同人又誰咎也

卦自下生故嚮上爲出誰咎詰咎之者之辭離羣索居則雖有高賢覲面而失之君子友天下之善士而鄙夫日嘖嘖於戶庭婦子之間謂可以避咎復以出門之交譏其不謹愚矣哉

六二同人于宗吝

以全卦言之衆陽相協以求同於二故曰于野以六二之動言之則二往同於人而麗於二陽之閒交不能遠故爲于宗同人云者遇物而卽相合之謂二近初三卽同之雖有正應不能待也其志褊矣是以九五號咷而興師

象曰同人于宗吝道也

君子之交近不必比遠不必乖是以堯親九族而必明俊德施及於百姓黎民周道親親而賓三恪懷萬邦君子友天下之善士以爲未足考三王俟後聖而求一揆若規規然就所親近者而與同雖得其善者亦一鄉之善士而已自困而何能行遠乎

九三伏戎于莽升其高陵三歲不興

六二一陰得位衆陽皆欲與之同不能徧與相應則爭必起三四五所以皆有出兵之象三密邇於二以相麗爲明固欲私二以爲己黨而忌五之爲正應五位尊諠正不可明與之爭故伏戎于莽待五之來合而邀擊之升其高陵謂五

也託處尊高灼見其情形而三之伏戎無所施至於三歲不興而必潰矣五之
所以大師能克也竇融之在河西旣歸心漢室而隗囂中梗欲連合以拒漢光
武洞照其姦明以詔融河西之人謂天子明見萬里卒歸漢而囂計遂窮蓋類
於此

象曰伏戎于莽敵剛也三歲不興安行也

敵剛謂五以剛健居中不能顯與相敵故伏戎以儼幸安行謂五旣升陵下望
知其伏而伏不得興則安驅而下與二合無所阻也凡爻辭有此爻而發彼爻
之義者彼爻爲卦主而此爻乃其所際之時所遇之事也易爲君子謀不爲小
人謀伏戎于莽之姦其吉凶不足道神所不告惟明示九五之用大師使知其
無能爲而進克不疑

九四乘其墉弗克攻吉

四居三五之間而與內卦相近退而就下故亦有爭同於二之情焉乘其墉者
將踰三而取二也乃以剛居柔三方伏戎以待則見不可攻而退以承乎五

故吉

象曰乘其墉義弗克也其吉則困而反則也

二非己正應義所不得而有始於忤求而終於安分既過能改之象

九五同人先號咷而後笑大師克相遇

號平聲

九五於二以剛之有餘濟柔之不足不特自得所應且以引二於衆陽之中而使合於中正三四既爭二且有于宗之吝義激所感不能不號咷焉而中正道合三姦既露四斂而退疑釋而相得以喜矣拔孤陰於羣爭之地非大用師不能克五惟剛中故能勝其任而定於一

象曰同人之先以中直也大師相遇言相克也

二五皆中道宜相應理直氣激不容已於號咷矣相克者非懲伏莽之戎則不得遇故曹衛折而晉宋始合隗囂破而竇融始歸士苟欲親君子必峻拒小人皆此義也

上九同人于郊无悔

上遠於二二已應五其與二同者浮慕其名泊然相遭於逆旅而已本無求同之志故失亦無悔

象曰同人于郊志未得也

志未相得人同而已亦同自謂不爭而亦惡足爲有無哉

三三大有

離乾上下

大有元亨

大有者能有衆大大謂陽也六五以柔居尊統羣陽而爲之主其所有者皆大則亦大哉其有矣元亨者始而亨也羣陽環聚非易屈爲己有而虛中柔順以懷集之則疑沮皆消而無不通矣此象創業之始以柔道通天下之志而羣賢來歸速於影響始事之亨也衆剛效美於一人乾道大行故有乾元亨之德而不言利貞者無剛斷以居中未能盡合於義能有衆善而不能爲衆善之所有則不足以利物柔可以順物情而不能持天下之變汎應羣有未一所從則其正不固也此卦之德王者以之屈羣雄綏多士致萬方之歸己而既有之後宰

制震疊移風易俗之事未遑及焉君子以之孫志虛衷多聞識以廣德而既有之餘閑邪存誠復禮執中之功猶有待焉蓋下學之初幾興王之始事也是以六五雖受天祐而致易而無備之戒焉其辭略者繫辭所謂辭有險易卦體簡而易見約舉其占而使人自求之也

彖曰大有柔得尊位大中而上下應之曰大有

居陽之中曰大中位尊故上下皆應

其德剛健而文明應乎天而時行是以元亨

離謂之文明者陰陽相錯之謂文陰質也陽文也離陰中而陽外其文外著火日外景其象也以文明之德應天之剛健時可行則行而行皆亨矣陽皆爲之用也

象曰火在天上大有君子以遏惡揚善順天休命

遏之揚之者乾道之健也因天之所予而揚之因天之所奪而遏之離明之昭晰也天者理而已矣順理而善惡自辨矣火炎上附天而明天左旋日右轉而

隨天以升降順天而行則明照於下故遏揚之順理象焉賞罰黜陟王者之事而言君子者若孔子作春秋行天命天討之事非必有位也君子成人之美不成人之惡亦此道爾

初九无交害匪咎艱則无咎

害謂違衆背明相悖而害也匪咎詰辭猶言豈非咎乎六五大明在上虛中以統羣有衆剛受命以定交初獨遠處置身深隱之地剛傲而不上交六五虛中延訪非有失賢之咎則非初九之咎而誰咎乎必若伯夷叔齊之絕周悲歌餓困備嘗艱苦而不恤然後可以免咎若嚴光周黨傲岸自得非艱難之時無艱難之心咎其免乎

象曰大有初九无交害也

當大有之世而居疏遠自絕之地則害君臣之義

九二大車以載有攸往无咎

九二剛而居中爲羣陽之所附託皆惟其載之而行才富望隆歸之者衆有與

五分權之象疑有咎矣然上應六五不居之以爲己有而往以輸之於五則迹雖專而行順不得以逼上擅權輦衆歸己而咎之

象曰大寧以載積中不敗也

誠信之輸於五者積於中則持盈而物莫能傷後世惟諸葛武侯望重道隆而集思廣益以事冲主能有此德

九三公用亨于天子小人弗克

亨許
兩反

亨本義依春秋傳作享古亨通獻享烹飪三字通用是也九三居內卦之上爲三陽之統率而三爲進爻率所有之大以進於上公領其方之小侯修貢篚以獻天子之象也乾健而陽富席盛滿之勢以上奉柔弱之主自非恪守侯度之君子必且專司自植故言小人弗克以戒五之慎於任人

象曰公用亨于天子小人害也

小人處此則尾大不掉天子諸侯交受其害矣

九四匪其彭无咎

彭許慎說鼓聲也鼓聲所以集衆而進之四陽連類四居其上而與內卦相接疑於衆將歸己乃其引羣陽而升者將與之進奉六五而使之富非號召衆剛使戴己也故雖不當位而无咎

象曰匪其彭无咎明辨晬也

晬之舌反從折與曾晬之晬異

晬明也居疑貳之地必別嫌明微以昭君臣之定分而後可无咎九四與離爲體故無冒昧之過

六五厥孚交如

句威如吉

厥孚陽自相孚也故曰厥交如交於五也五虛中而明於任使其俯有羣陽也以循物無違之道行其坦易無疑之心衆皆願爲其所有羣陽相孚以上交道極盛矣而又戒以威如則吉者五本有德威存焉但衆剛難馭雖大公無猜而抑必謹上下之分以臨之益之以威初不損其柔和之量而無不吉也

象曰厥孚交如信以發志也威如之吉易而无備也

易以敢反

信陰德也故易每於陰言信焉虛中柔順乃能篤信於人而不貳其於物多疑

者必其有成見以實其中而剛於自任者也六五孤陰處尊位撫有衆陽而不猜其信至矣發志謂感發衆志而使歸己易和易近人無備不防其僭逼也創業之始感人心以和易而久安長治之道必建威以消萌大有之所未逮故不足於利貞而又以威如乃吉戒之

上九自天祐之吉无不利

此爻之辭又別一義例所以贊六五之德至而受福也天卽指上而言上九在五上而五能有之自天祐也其義繫傳備矣吉以居言无不利以行言

象曰大有上吉自天祐也

大有而能有在上之陽則不特人助之而天亦祐之矣

謙

艮下坤上

謙亨君子有終

謙古與慊通用不足之謂也此卦惟一陽浮寄於衆陰之中而不能如師比之得中復之振起與剝略同其不足甚矣特陽未趨於泯喪而止於內耳以其不

足伏處於三陰之下安止而順受之不爲中枵外侈以自剝喪爲能受益而進於善是以君子有取焉亨之爲義彖傳備矣又言君子有終者必君子而後能終其謙也道之在天下也豈有窮哉以一人之身藐然孤處於天地萬物之中雖聖人而不能知不能行者多矣其在心也嗜欲攻取雜進於耳目以惟微之道心與之相感勢不能必其貞勝皆孤陽介立之象也君子知此念道之無窮而知能之有限故學而知不足教而知困歉然望道而未之見其於天下也則匹夫匹婦勝予是懼而不忍以驕亢傷之故雖至於聖且不自聖以求進德於無已而虛受萬物以廣其仁愛斯則謙而有終矣若無忌憚之小人如老聃之教以私智窺天地鬼神之機持人情之好惡欲張固翕以其至柔馳騁天下之至剛己愈退則物愈進待其進之己盈爲物情之所不容然後起而撲之無能出其網羅者以爲妙道之歸則始於謙者終於悍故其流爲兵家之陰謀申韓之慘刻小人之謙其終如是與謙道相反其亨也不如其無亨矣五上二爻行師侵伐亦謙必有之變也故內卦言君子言貞而外卦但言吉利

彖曰謙亨天道下濟而光明地道卑而上行

天道九三之陽也他卦皆以三爲進爻四爲退爻惟謙一陽伏處於三陰之下豫一陽拔出於三陰之上因內外而分上下故謙曰下濟豫曰出地因象立義所謂不可爲典要也光明艮之德也艮陽在外光明外見光者明之加於物者也地道之上行陽降而陰自升若陽讓之使上也陽知其不足而猶然下以濟陰之乏其志光明陰所共白非小人僞爲卑遜以屈天下之陰謀故卑而上行無所不順此其所以亨也

天道虧盈而益謙地道變盈而流謙鬼神害盈而福謙人道惡盈而好謙

好惡皆去聲

虧盈益謙者物壯盛則衰槁穉弱則增長也變盈流謙者山阜高危則夷下隨流以充谿壑也天地人神情理之自然君子體之以修德小人測之以徼利然而其可亨一也

謙尊而光卑而不可踰君子之終也

尊而光艮德也以一陽爲羣陰之主處內卦之上止其淫洩其道尊也其退伏

於三陰之下者自見不足而非以媚物志可大白於天下其光也卑而不可踰
坤德也天尊地卑坤順之德固然而其道上行順理以升山雖高終在地中不
可踰也君子以養己之德而順天下之情志正而量弘斯以謙始而以謙終非
君子不能也

象曰地中有山謙君子以裒多益寡稱物平施

稱施皆去聲

地中有山者謂於地之中而有山也山者地之高者非地之外別有山也地溥
徧乎高下山亦其所有爾人見山之餘於地而不知山外乃地之不足可增而
不可損也裒聚也施者惠民之事地道周行於天以下時有所施化多者裒聚
之而益多寡者益之使不乏固不厚高而薄下抑不損高以補下各稱其本然
而無容私焉故高者自卑卑者自卑而要之均平君子施惠於民務大德不市
小恩不知治道者徇疲情之貧民而剗削富民以快其妒忌釀亂之道也故救
荒者有蠲賑而無可平之粟價定賦者有寬貸而無可均之徭役雖有不齊亦
物情之固也然不然則爲王莽之限田徒亂而已矣

初六謙謙君子用涉大川吉

卦之所以爲謙者以九三一陽處陰下不自足而能止爲義然陰之數不富而其德柔故六爻俱有謙道焉此爻之又一例也內卦體也謙以修己外卦用也謙以待人君子之謙以反己自克而求進於道非以悅人也故內卦兩言君子而外卦有戒辭焉謙謙者處不足之地而持之以歉也初六當潛藏之位初學立志之始知道之廣大而知行之不逮柔輯其心以遜志於道君子之修也用涉大川而吉者下學而上達日見不足則日益雖以涉浩渺無窮之域而馴至之無不吉也

象曰謙謙君子卑以自牧也

處位最下而以柔爲道曰卑牧養也若牧人之養牛羊謹司其放佚而慎調其芻秣積小以成大也

六二鳴謙貞吉

鳴音命

鳴鳥相呼告也九三爲謙之主二近而承之上六其應九四爲豫之主初六其